



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

**Disputationes|| ROBERTI BELLAR-||MINI E SOCIETATE  
IESV,|| DE CONTROVERSIIS CHRISTIANAE|| FIDEI,  
ADVERSVS HVIVS TEM-||poris Hæreticos,||**

Tribus Tomis comprehensæ.||

De Baptismo Et Confirmatione - Dvobus Libris Explicata

**Bellarmino, Roberto Francesco Romolo <Heiliger>**

**Ingolstadii, [1599]**

**VD16 B 1607**

XXIV. De cæremoniis Baptismi.

[urn:nbn:de:hbz:466:1-53934](https://nbn-resolving.org/urn:nbn:de:hbz:466:1-53934)

134 *Cap. XXIV. De Sacramento Baptismi. Lib. 1.*  
zatus aqua Ioannes, non est mirum, quia mortuus est, ante  
quam lex de Baptismo Christi obligaret.

## CAPVT XXIV.

### *De caeremoniis Baptismi.*

**D**E caeremoniis baptizandorum copiosè scribit  
Thomas Waldensis, tomo 3. de Sacramentali-  
bus, tit. 5. cap. 45. & sequentibus septem, contra  
Ioannem Wiclefum, qui omnes ferè Ecclesie  
Catholicæ ritus, & caeremonias circa Baptismum reiciebat.  
Easdem caeremonias fusè tradunt, & explicant Ordo Roma-  
nus; Alcuinus in libro de diuinis officiis, cap. de Sabbato  
sancto; Amalarius lib. de officiis Ecclesiasticis, & Rabanus lib.  
1. de institutione clericorum; & ex veteribus Cyrillus in Cata-  
chesibus, & Ambrosius in lib. de Sacramentis.

Eisdem ritus, paucissimis exceptis, damnant etiam hereti-  
ci huius temporis, ac præsertim Ioan. Calvinus, lib. 4. Institut.  
cap. 25. §. 19. & Illyricus Centur. 1. lib. 2. cap. 6. & Centur. 2.  
cap. 6. qui tamen non aliud argumentum proferunt, nisi quod  
ritus isti non sint in diuinis literis, neque præcepto, neque  
exemplo commendati.

Nos autem illis duo obiicimus. **PRIMO**, quòd ipsi etiam  
aliquid præscribant in administratione Baptismi, quod in sa-  
cris literis non inuenerunt, Nam in libello de formula Sacra-  
mentorum ministrandorum, præscribit Calvinus **PRIMO**,  
vt infans adferatur ad Baptismum die Dominico, aut certè a-  
lio die, quo populus in Ecclesia ad concionem conuenit, vt  
coram populo fiat Baptismus. **SECUNDO**, vt qui infantes  
adferunt, interrogentur; an spondeant, se infantes illos, cum  
adoleuerint, instituturos in doctrina fidei, & morum; & spon-  
sione facta pergatur in Baptismo. **TERCIO**, vt nomen impo-  
natur infanti baptizando. **QUARTO**, vt forma Sacramenti  
pronunciatur lingua patria. **QUINTO**, vt recitetur Symbo-  
lum, & Oratio Dominica, aliæque preces. At nihil horum in  
Scriptura inueniet. **Lutherani** addunt etiam abrenunciatio-  
nem Satanae, & pomparum eius, vt patet ex agenda Saxonica,  
& aliis similibus. Vnde Illyricus etiam non audet reicere ab-  
renun-

renunciationem, Cent. 1. lib. 2. cap. 6. col. 497. & ipse etiam Kemnitius in 2. parte Exam. pag. 219. examinans canonem 7. de Baptismo, fatetur inter baptizandum proponendam esse abrenunciationem. Denique Lutherus in suo Catechismo voluit etiam pingi signum crucis in fronte, & pectore baptizandi. Ego verò optarem aliquid horum demonstrari testimoniis, vel exemplis diuinarum literarum. Nam Scripturæ recensent Baptismum multorum millium, Actor. 2. & 4. Item Eunuchi Reginae Æthiopum, Actor. 8. Sancti Pauli, Actor. 9. Cornelij, Actor. 10. Lydiae, & custodis carceris, Actor. 16. & duodecim Asianorum, Actor. 19. sed nulla mentio fit diei Dominicæ, neque Ecclesiæ, aut frequentiae populi, aut impositionis nominis, aut susceptorum, & sponsonis, aut precationis Dominicæ, & Symboli Apostolici, aut etiam signi crucis: quæ omnia notauerunt etiam Centuriatores, Cent. 1. lib. 2. cap. 6. col. 496. & 497. non haberi in Scripturis. Neque his repugnat, quod oratio Dominica sit in Scripturis, & Symbolum, saltem quoad sensum. Nam in Scriptura non habetur, ut recitentur ista in Baptismo; immò nulla precatio legitur facta in tot locis Scripturæ, ubi narrantur Baptismata supra notata. Vel igitur aduersarij reiiciant omnes omninò cæremonias, & solum baptizent aspergendo aquam, & recitando verba; aut certe quærant alia argumenta, quibus opugnent ritus ab Ecclesia approbatos.

SECUNDO, illis obiicimus testimonium veteris Ecclesiæ. Omnes enim ritus, quibus nunc utimur, antiquissimi sunt, & vel ex Apostolorum traditione manarunt, vel à sanctissimis Patribus instituti sunt, quorum auctoritas, præsertim tot seculis ià confirmata, plus apud nos valere debet, quàm nouatorum clamores, cum ipsi nihil probare possint à nobis fieri contra sacras literas. Hoc igitur solum præstandum erit à nobis, ut adferamus pro singulis ritibus testimonia antiquitatis.

Quod ut facilius fieri possit, distribuemus cæremonias.

Baptismi in tres classes. Aliæ enim præcedunt Baptismum, aliæ comitantur, aliæ sequuntur.